

四庫全書

史部

欽定四庫全書

史部

平定準噶爾方略正編卷四十五至

七

詳校官監察御史臣孫家賢

通政使司副使臣莫瞻菴覆勘

總校官進士臣朱鈐

校對官編修臣周厚轅

謄錄監生臣汪瀾

欽定四庫全書

平定準噶爾方略正編卷四十五

乾隆二十二年冬十月丁卯

訥叅贊大臣哈寧阿帶兵會剿

上諭軍機大臣曰哈寧阿奏稱准將軍兆惠來文由奎屯前往濟爾哈朗會同雅爾哈善等自托多克晶托里至博羅塔拉安設臺站巡查等語現在兆惠等所安臺站俱已接續哈寧阿無庸前往惟朱

爾都斯路所設臺站被賊沙喇斯瑪呼斯等搶掠
經滿福帶兵前往迄今二十餘日未據奏報復令
阿里衮帶兵接應著哈寧阿即帶現兵徑往朱爾
都斯會同滿福等進剿沙喇斯瑪呼斯賊衆仍候
將軍等議定官兵過冬之處協助雅爾哈善辦事
在叅贊大臣上行走此際滿福若業經勦滅賊衆
接續臺站哈寧阿即前赴雅爾哈善軍營至哈寧
阿所奏從前行至巴克庫蘇臺曾派署章京濟德

署守備楊天祿等搜捕相近臺站之瑪哈沁等雖
非勦滅大隊賊衆可比亦應加恩著查明照搜勦
瑪哈沁之坐臺筆帖式例一體送部議叙

命副都統莽古賚馳驛前赴北路軍營在叅贊大臣
上行走

戊辰

諭署定邊左副將軍策布登扎布交代來京

上諭軍機大臣曰昨命將軍成衮扎布兆惠等來京

籌議軍務著策布登扎布亦馳驛來京將定邊左
副將軍印務交納穆扎爾署理阿桂著往代納穆
扎爾莽古賚著往代阿桂阿桂不必候莽古賚即
前赴科卜多納穆扎爾與阿桂交代後即赴烏里
雅蘇台策布登扎布與納穆扎爾交代後再行來
京

己巳

諭令副都統圖倫楚等同將軍等分隊來京

上諭軍機大臣曰昨諭將軍大臣等來京應同來之
大臣侍衛等俱經點出今思圖倫楚端濟布努三
亦當同來可傳諭成袞扎布令其分隊來京

庚午

諭定邊將軍成袞扎布等交代防勦事宜

上諭軍機大臣曰將軍成袞扎布等奏稱撤兵到濟
爾哈朗會同兆惠於兩路兵內酌留二三千名整
備口糧馬匹於正月下旬由伊犁前往沙喇鄂勒

進勦巴圖爾烏巴什等賊衆所辦尚是成衮扎布
兆惠將軍營事務辦理具奏後即同富德舒赫德
來京明瑞著停其前來雅爾哈善在濟爾噶朗駐
劄總辦軍務永貴明瑞愛隆阿額爾登額協辦軍
務於濟爾哈朗至巴里坤適中之地派兵一千著
哈寧阿駐劄鄂實三格瑚爾起為副其琿齊沙喇
斯瑪呼斯賊衆有散逸在附近地方者即帶兵數
百搜勦琿齊若過戈壁往沙喇壁勒則不必遠勞

我師沙喇斯瑪呼斯等若往伊舊游牧哈喇沙爾
自當與額敏和卓相遇已諭阿里衮會同追勦今
尚未可懸定哈寧阿出兵後即著愛隆阿駐劄俟
哈寧阿回兵再往濟爾哈朗軍營所設臺站著兩
處副都統等輪班巡查行走其瑚爾起進勦琿齊
陣亡帶傷官兵著成衮扎布等查明報部分別優
卹議叙至駐兵所需口糧著成衮扎布兆惠等籌
議速為運送即行具奏

大學士管理陝甘總督黃廷桂疏奏巴里坤屯
田事宜

黃廷桂奏言竊查雍正年間巴里坤駐劄大臣
時奎素石人子巴里坤以至尖山一帶地畝俱
經開懇尚有溝塍形迹臣於上年冬月奏請派
撥綠旗官兵五百名前往開墾試種以濟兵食
嗣因逆賊巴雅爾等叛逃派調軍前旋議撤回
臣復札知巴里坤大臣派現存綠旗兵丁將渠

道先行開濬并踏勘各處水泉可溉地畝若干
旋據覆稱委總兵丑達勘得尖山子起至奎素
一帶百餘里內從前地畝舊迹俱存係取用南
山之水共有正渠九道自山口以外多滲入沙
磧必須木槽接引方可暢流其三道河以北自
鏡兒泉三墩起至奎素止亦有開墾地畝正渠
三道及支渠形迹荒蕪日久渠身湮塞現在工
多人少且工料必須撥運等語臣查善後事宜

案內巴里坤駐劄滿兵三千名綠旗屯田兵一千五百名今駐防滿兵尚需時日而開墾地畝似宜早計請於甘涼肅三處先派種地官兵一千名於來年正月前往疏濬水泉開引渠道需用工匠物料田器牛隻等項均由內地辦運至二三月間土膏萌動即分佈各兵於可墾之地翻犁試種查巴里坤一帶氣寒霜早惟宜青稞應令各兵於青稞外如糜穀之類少為試種倘

獲有收再行加增其官兵整裝銀兩照例給發
奏入

上諭軍機大臣曰黃廷桂奏派兵一千名於來春前往巴里坤等處屯田等語自應及時籌辦但此尚在近地其烏魯木齊等處亦須漸次屯種接濟兵食其如何相度水利測驗土脈及派兵前往一切口糧牛具籽種等項豫為料理之處著傳諭黃廷桂詳悉具奏

辛未

諭署定邊左副將軍策布登扎布來京請

訓

上諭軍機大臣曰昨諭兩路大軍大臣等於十二月
初十以內來京請訓俟來春進兵今思將軍成袞
扎布宣力軍營將及一載自應稍為休息來年令
伊在烏里雅蘇台辦理副將軍事務策布登扎布
辦理諸事皆合機宜較從前大有進益來年進兵

以兆惠為定邊將軍以策布登扎布為右副將軍
著策布登扎布即馳驛來京請訓喀爾喀王公內
有能協同辦事之人伊即指定一二人具奏無庸
派出兵丁但將親隨人役酌量足用仍加恩賞銀
二千兩為整理行裝之用其行裝就近自烏里雅
蘇台由阿濟必濟先遣發往巴里坤伊與納穆扎
爾交代後作速來京

諭大學士管理陝甘總督黃廷桂派解馬匹事宜

上諭軍機大臣曰明春派兵往沙喇斡勒勦賊巴圖爾烏巴什等酌用兵二千五百名人給馬三匹計需馬七千五百匹并辦給侍衛大臣官員等馬五百匹共用馬八千匹可傳諭黃廷桂即照數挑選派賢能員弁自肅州送至巴里坤沿途加意餽養約十一月可到自巴里坤至軍營已另派官兵解送著遵旨速行辦理

諭定邊將軍成衮扎布等整頓軍裝及運送馬匹額

數

上諭軍機大臣曰此次出兵以來將及一年恐兵丁衣服器械未能整齊理應加意辦理著成衮扎布兆惠等查明應行補換者自己巴里坤運送即行籌議具奏現在天氣已寒伊等未能進勦前曾降旨於來春派兵二三千前往沙喇鄂勒其口糧馬匹數目業經交議今朕定兵數二千五百名人給馬三匹官員大臣等添備五百匹已諭黃廷桂辦馬

八千匹備用矣可傳諭將軍成衮扎布等知之又
諭曰黃廷桂所辦馬匹自肅州送至巴里坤即另委
官兵解送著派出厄魯特散秩大臣巴圖濟爾噶
爾乾清門侍衛郭木尼勒圖富紹自巴里坤解送
濟爾哈朗巴圖濟爾噶爾賞銀一百兩郭木尼勒
圖富紹各賞銀五十兩即前赴巴里坤等候仍派
察哈爾索倫兵四百名沿途防備嗎哈沁其馬匹
加意照料如遇風雪即便住宿進兵之日以巴圖

濟爾噶爾為領隊大臣郭木尼勒圖富紹照從前
圖倫楚例帶兵行走

諭駐劄巴里坤辦事提督豆斌派兵轉解馬匹

上諭軍機大臣曰來歲進勦沙喇摩勒賊衆已諭黃
廷桂派馬八千匹送至巴里坤其由巴里坤送至
軍營亦派出巴圖濟爾噶爾郭木尼勒圖富紹等
接管轉解著傳諭豆斌於成衮扎布等撤回之索
倫蒙古兵內選派四百名交巴圖濟爾噶爾等帶

領將馬匹緩行趕送到噶爾藏多爾濟游牧加意
牧放俟將軍等議定駐兵之地趕送交收途次如
遇風霜稍為歇息諒不至於疲乏併傳諭成衮扎
布兆惠黃廷桂知之

諭兩路將軍大臣特派官兵牧放軍營馬匹

上諭軍機大臣曰現在酌議駐兵過冬著傳諭成衮
扎布兆惠雅爾哈善等軍營所有馬匹若仍令各
官兵自行餵養恐多疎懈甚至有偷宰等事自應

官為收查按數特派官兵擇水草佳處加意牧放
俟進勒沙喇壁勒官兵回時撥往辦理回部自然
臆壯適用雅爾哈善既署理將軍事務更當盡心
辦理將收數若干及牧放處所詳悉奏聞

壬申

諭甘肅巡撫吳達善赴巴里坤辦事

上諭軍機大臣曰昨命黃廷桂派撥馬匹送至巴里
坤現在阿里衮帶兵進勦著吳達善即赴巴里坤

收管馬匹料理轉解事竣再回原任併傳諭黃廷
桂知之

諭定邊將軍成衮扎布等酌議馬匹數目

上諭軍機處臣曰明春前往沙喇鄂勒兵丁二千五
百名共派馬八千匹已交黃廷桂等辦理今思冬
寒之候解送維艱酌籌人給馬二匹合之大臣官
員共五千五百匹成衮扎布等於軍營馬匹內挑
選二千五百匹加意牧養以符人給三匹之數而

解送之馬亦可暫存以備辦理回部之用是否可行成衮扎布等酌議具奏此時八千馬匹仍照數豫備計解送之日伊等即咨行黃廷桂酌量派撥

又

諭曰昨諭豆斌挑選兵丁四百名解馬八千匹沿途照看似覺不敷今又酌減為五千五百匹則已足用著傳諭豆斌再派兵丁一百名豫備若成衮扎布等議奏仍須送馬八千匹行文到日豆斌即派

兵五百名解送

丙子

命議處戶部侍郎阿里衮

上諭軍機大臣曰據阿里衮奏稱將軍成衮扎布奏
摺行文事件現俱馳遞無滯伊遵旨停止帶兵前
往其諭交將軍成衮扎布之旨由濟爾哈朗路馳
送等語將軍成衮扎布原係由朱爾都斯一路進
兵昨被搶之阿勒輝臺站即係朱爾都斯一路所

設而現在遞到事件乃由濟爾哈朗一路與朱爾都斯何涉此路臺站經滿福帶兵前往安接至今未有信息今事件雖由濟爾哈朗路遞到其朱爾都斯臺站曾否撤回滿福現在何處應如何探聽策應之處更屬緊要前因阿勒輝臺站被搶將軍成袞扎布等奏報未通阿里袞竟置之不問經朕屢降諭旨令伊帶兵速往接應豈可因濟爾哈朗一路遞到事件而謂朱爾都斯臺站亦遂通耶且

前旨所謂臺站若通即不必前往亦專指朱爾都斯路之阿勒輝臺站而言非謂濟爾哈朗路遞到事件也阿里袞辦事若此朕實不知為何心著交部嚴察議奏伊如此行止朕早已見及昨諭阿里袞帶兵接應滿福照管行糧巡臺勦賊計此際已奉到朕旨帶兵前往矣現在已至何處滿福信息如何朱爾都斯路曾否接續抑或撤回之處作速奏聞

申諭定邊將軍成袞扎布等酌議駐兵事宜

上諭軍機大臣曰據阿里袞奏稱准將軍成袞扎布等來文酌撥官兵口糧三百石送赴軍營又云兆惠候辦齊口糧即前赴伊犁等語看伊等現在情形未必能衝寒即往著遵朕旨或在濟爾哈朗過冬或在烏魯木齊亦可伊等此時想已會合一處即將駐劄地方及昨交議馬匹數目速為議奏再來京請訓可也

諭署定邊左副將軍策布登扎布等派兵搜查藏匿
賊衆

上諭軍機大臣曰據烏梁海人等告稱阿爾台以外
納林布魯爾阿巴蘭克伊特等地方尚有隱匿之
烏梁海等或阿睦爾撒納郭勒卓輝等賊藏匿於
此亦未可定已諭護送哈薩克來使之和碩齊等
詳細搜查恐逸賊頗多又加以阿睦爾撒納在彼
兵不敷用著傳諭策布登扎布納穆扎爾等派唐

喀祿帶兵二百名同侍衛二人在彼處適中之地
駐劄候和碩齊信息如有阿睦爾撒納及大隊賊
人在彼伊等即接應和碩齊仍報知駐劄科卜多
大臣添兵接應其和碩齊有具奏事件即送交唐
喀祿轉遞唐喀祿係獲罪之人今令其効力自贖
宜知奮勉策布登扎布即妥協辦理

署理定邊左副將軍印務策布登扎布等疏奏
擒獲托音喇嘛羅卜藏阿喇卜珠爾正法

策布登扎布等奏言臣等遵

旨將戕殺卡倫侍衛之托音喇嘛羅卜藏阿喇卜珠
爾等嚴緝務獲即通行四部落十月初二日哈
爾噶納之攜眷卡倫章京濟爾噶勒等將羅卜
藏阿喇卜珠爾拏獲臣等審訊起意戕殺侍衛
卓勒和等情節供認不諱即於本日正法奏入
報

聞

戊寅

諭戶部侍郎阿里衮進勦事宜

上諭軍機大臣曰昨因阿里衮奏成衮扎布軍營奏報皆由濟爾哈朗馳遞竟置朱爾都斯於不問已降旨交部察議仍令帶兵會合滿福如額敏和卓告稱沙喇斯瑪呼斯等逃往哈喇沙爾即會同進勦想此時已帶兵前往矣但滿福自奏阿勒輝臺站被掠後並無奏報深為厯念是以諭阿里衮速

探信息其探信之道不過由第一臺起查至何臺
阻隔即已知信息不通之由乃並未如此辦理朕
所不解此時額敏和卓若來告賊衆已往哈喇沙
爾阿里衮即前赴協勒如未有實信即速往接應
滿福沿途所得信息作速奏聞又

諭曰昨諭副都統哈寧阿不必巡查兆惠等所設臺
站即帶兵接應滿福想此時已會兵一處矣汝福
久無奏報著哈寧阿將帶兵已至何處辦理情形

如何速行具奏

諭吐魯番貝子額敏和卓進勦事宜

上諭貝子額敏和卓曰昨據爾報稱遣人前赴哈喇沙爾探取叛賊沙喇斯瑪呼斯等信息如賊衆赴哈喇沙爾即帶兵前往辦理朕已傳諭巴里坤辦事大臣阿里衮云如沙喇斯瑪呼斯等賊人回至哈喇沙爾可帶兵往會額敏和卓勦捕此時爾差遣探信之人亦應歸告如賊果回哈喇沙爾爾即

告知閭相師作速知會阿里衮會同進勦倘未由
此路亦知會阿里衮會同滿福進勦可也

己卯

申諭戶部侍郎阿里衮等進勦事宜

上諭軍機大臣曰據阿里衮奏稱奉到諭旨帶兵二
百名至阿勒輝等處會合丑達兵丁進勦等語阿
里衮前奏濟爾哈朗臺站現在通行停止進兵經
朕飭諭始行前往今據軍營奏報朱爾都斯臺站

已經撤回自不必另辦阿里衮惟會同滿福追勦
沙喇斯瑪呼斯等賊衆至額敏和卓欲帶綠旗兵
二百名前去特為回兵缺馬之故阿里衮何必屢
向閭相師查問甚屬糊塗今阿里衮已帶兵前往
此旨及諭額敏和卓之旨俱著豆斌轉發又

諭吐魯番貝子額敏和卓曰據爾奏報巴里坤大臣
等遵朕諭旨訪查沙喇斯瑪呼斯等賊人信息又
因道遠若俟訪查回報再行前往恐致耽延已於

十月初一日帶兵起程至托克三駐候等語朕深
為嘉許向來辦事人員每候信息以為行止爾能
奮勉如此深協機宜加恩賞給大緞四端明歲辦
理葉爾羌喀什噶爾時雖有將軍大臣而回部情
形爾所熟悉將命爾叅贊軍務在前隊行走爾其
益體朕恩實心奮勉以奏膚功永膺懋賞特諭

庚辰

申諭戶部侍郎阿里衮接應滿福進勦

上諭軍機大臣曰據滿福奏稱帶兵至朱爾都斯接
續被賊搶掠之六臺站其將軍成袞扎布之兵未
知所在又據瑪呼斯之博多羅克告稱賊人游牧
到喀喇呼魯向呼魯木什烏闌和屯而去已帶兵
從巴顏阿滿臺站尋賊踪跡追往但馬匹多屬乏
弱等語滿福進兵月餘辦理勦賊事宜毫無頭緒
總以馬乏為詞伊在吐魯番休息許久何至遽然
疲乏著傳諭阿里衮即帶兵徑往呼魯木什等處

協同進勦再額敏和卓現帶兵在托克三駐劄候
信呼魯木什等處若與哈喇沙爾相近阿里衮即
知會額敏和卓亦帶兵赴彼協同勦賊可也

壬午

諭戶部侍郎阿里衮等招服賊衆事宜

上諭軍機大臣曰成衮扎布等奏稱遵朕諭旨賞給
宰桑三都克銀兩留於軍營派伊屬下敦多克哈
什哈敦多克策凌等招服沙喇斯瑪呼斯人等雖

亦勦撫並行之策但辦理此等叛賊已諭阿里衮
滿福帶兵前往若伊等聞知將軍處使人招降即
不奮勉勦賊又或叛賊等偽為投順使我兵弛備
均未可定著速行傳諭阿里衮滿福賊衆若未歸
降自當勦殺即成衮扎布遣人招服業已來降亦
應沿途留心察看稍有變動即行掩襲務宜相機
行事又沙喇斯瑪呼斯有倡亂數人及訛傳大兵
為阿睦爾撒納所敗之數人情尤可惡阿里衮等

即詢問敦多克哈什哈等務須擒拏解京至敦多克哈什哈等既隨三都克効力行走阿里衮辦理叛賊時詳問伊等賊中形勢若招降後有密行辦理之事仍示伊等以沙喇斯瑪呼斯等已降復叛是以不便存留至爾等係隨三都克輸誠効力本不相同勿生疑忌此數人俱賞給藍翎照看回營亦傳諭成衮扎布知之

臣等謹案沙喇斯瑪呼斯鄂拓克叛降反覆

罪不容誅我兵悉力窮追逸賊自無從遁匿
勦撫並行之策本非勢所必需至敦多克哈
什哈等即係沙喇斯瑪呼斯部衆雖一時効
力軍營而若輩狡詐性成亦難深信我

皇上先幾洞燭屢

勅周防茲復

諄誠在事諸臣奮勉勦賊毋狃降弛備並

諭及臨時相機籌辦而滿福以接續臺站奏報稽時

即

命大臣等統兵策應探信亦恐其為賊所愚也厥後
滿福果誤信賊人詭持軍檄墮計捐軀今恭
繹前後

訓旨仰見

聖明鑒察不爽纖毫而防患未萌

籌畫備至諸臣乃得有所稟承雖萬里以外無異呈

形目前矣

諭大學士管理陝甘總督黃廷桂派兵解送馬匹

上諭軍機大臣曰黃廷桂奏稱豫備軍營馬匹請派
自準噶爾脫出之官兵解送等語所見甚是伊等
久居邊地既知水草復嫻於牧放較之綠旗兵丁
自屬不同從前派出副都統巴圖濟爾噶爾等令
先至巴里坤候馬匹到日派兵四百名解送黃廷
桂想已奉到此旨即將脫出兵丁等歸入四百名
數內仍傳諭伊等加意奮勉果能牧養得宜將來

仍歸各本旗佐領當差至黃廷桂所奏候軍營咨
取馬匹文到即行解送此係前次諭旨今不必候
咨即辦理解送可也

甲申

申諭戶部侍郎阿里衮會兵進剿

上諭軍機大臣曰阿里衮奏稱帶兵將阿勒輝等臺
站巡查辦理其丑達之兵遣回鹽池等處臺站往
來搜勦賊人等語鹽池距巴里坤甚近竊掠臺站

不過數嗎哈沁賊耳不必將丑達遣回即速會兵
前往朕屢諭阿里衮接應滿福進勦沙喇斯瑪呼
斯賊衆務奮勉速行毋少瞻顧

諭叅贊大臣富德勦賊事宜

上諭軍機大臣曰富德奏稱逆賊阿睦爾撒納雖已
逃入俄羅斯而伊犁等處藏匿賊黨仍須勦殺現
在喀喇瑪嶺駐劄古爾班察爾一帶俱安設卡倫
防守等語朕屢經降旨令伊等來京富德想尚未

奉到故有此奏但逆賊琿齊額林沁達瓦詐稱歸降又復逃去富德如回兵時或遇此等叛賊或偵探去向相離不遠即帶兵勦殺富德兵馬駐憩已久自屬可用若道遠不便即徑往濟爾哈朗同成衮扎布等來京可傳諭富德知之

丙戌

申諭將軍大臣籌議駐兵進勦日期

上諭軍機大臣曰昨諭成衮扎布兆惠富德等來京

請訓今計算伊等往返日期須無誤進兵之時方
為妥協著傳諭伊等將現在駐兵何處何時到京
及請訓回營能與進剿之時適相符合處一面奏
聞一面速行來京如恐稍有遲悞現在雅爾哈善
駐劄濟爾哈朗軍營或令其就近帶兵前進伊等
再自京馳赴料可追及即與雅爾哈善公同籌議
具奏

命以伯格里屬人分賞駐防官兵嚴加管束

上諭軍機大臣曰前諭將伯格里之妻送京安插所有屬人一百六十餘口交直隸總督方觀承分給天津青州保定等處駐防滿洲為奴著傳諭各該將軍城守尉等此等厄魯特俱係獲罪之人若不遵約束即正法示衆毋得任其脫逃

命叅贊大臣永貴署理西安巡撫印務所辦軍營糧務俟定長服滿後前往接辦

丁亥

命優卹喀爾喀公品級齊巴克扎卜及議叙効力官

兵

上諭軍機大臣曰納穆扎爾奏稱進勦哈喇巴等處藏匿之明噶特烏梁海等喀爾喀公品級齊巴克扎卜帶兵前至阿爾呼特等處將賊衆盡行勦殺齊巴克扎卜被鎗傷腋陣亡等語似此奮勇捐軀深可憫惻著實封公爵令伊子承襲將其佐領屬人另編一扎薩克仍賞銀三百兩其陣亡帶傷

官兵查明恩卹此次都爾伯特汗策凌等之屬人
亦有奮勉者並酌量賞賜其効力得功官兵交部
議叙仍將頭等得功之人優加賞賚

戊子

命以邁斯漢情實勾決罪案傳

諭兩路軍營

上諭軍機大臣曰今日刑部進情實官犯本內將原
任叅將邁斯漢擬以情實去年雅爾哈善等派出

邁斯漢帶兵往探兆惠信息伊並非中途遇敵不能前進乃遷延道路竟自回營因命拏解審訊擬斬監候復命查其先世有無陣亡之人據該部將伊叔曾祖陣亡查奏夫陣亡之子孫從寬免死者原指尋常罪犯而言並非軍法可比今邁斯漢帶兵數百同往之高天喜亦已殺賊百餘收其牲畜邁斯漢何難奮力前行乃聽俘賊虛詞即恇怯不進爾時若不另派官兵接應兆惠必至債事則邁

斯漢之罪雖伊祖父陣亡亦難稍逭是以予勾正法八旗世僕等若恃祖父陣亡派往軍前並不効力於習俗大有關係果其情有可矜朕亦必加原宥若似邁斯漢失機畏怯豈能屈法加恩可傳諭兩路將軍大臣等通行曉示軍營官兵等知之

十一月己丑朔

諭定邊將軍成衮扎布等進勦巴哈曼集等事宜
上諭軍機大臣曰覽兆惠雅爾哈善等奏摺現在軍

營辦理情形總以明春進兵為要著成衮扎布等
遵旨來京至辦理沙喇斯瑪呼斯賊衆已命阿里
衮哈寧阿等陸續前往惟扎哈沁巴哈曼集等叛
逃之後乘隙搶掠臺站據雅爾哈善等奏捉生詢
問知巴哈曼集為得木齊哈勒拜所敗逃入烏勒
郭蘇山內之沙扎海地方等語雖未可全信而賊
衆究屬潛匿臺站終有疎虞今雅爾哈善已派端
濟布前往著傳諭成衮扎布將哈寧阿調回令其

協助端濟布若前行已遠即於濟爾哈朗軍營派兵一二百名發往倘端濟布等未能勦滅賊衆則成衮扎布等起程來京沿途搜勦以清臺路又叛逃之琿齊額林沁達瓦等已諭富德歸途之便就近搜勦併傳諭哈寧阿等知之

庚寅

諭署定邊左副將軍策布登扎布等協勦巴哈曼集等賊衆

上諭軍機大臣曰據雅爾哈善奏稱巴哈曼集屬人
藏匿烏勒郭蘇山有逃往阿爾台之信此事容亦
有之伊等或投俄羅斯或合烏梁海均未可定可
傳諭策布登扎布納穆扎爾等即行文科卜多軍
營速交唐喀祿等令其沿途偵探協同勦殺其車
木楚克扎布所辦烏梁海情形若何作速奏聞
議奏派調喀爾喀等官兵事宜

署定邊左副將軍策布登扎布奏言臣奉

恩旨於明年前往西路軍營請派出圖謝圖汗部落
之公品級扎薩克三都卜多爾濟協理頭等台
吉齊旺扎卜賽音諾顏部落之扎薩克達什協
理頭等台吉敦多卜四等台吉庫爾奎扎薩克
圖汗部落之協理台吉旺舒克等并調取喀爾
喀兵二百名於達什達瓦扎哈沁尼魯特兵內
挑選一百名將有馬之索倫兵挑選一百名若
進勦時無需多兵即將現在軍營官兵之乏弱

者撤回如蒙

俞允請照例豫行支給整裝銀兩先行起程奏入得
旨軍機大臣速議具奏尋議策布登扎布請調取喀
爾喀等兵丁更替軍營兵丁之乏弱者事屬可
行但喀爾喀災歉之後生計頗艱若多為調遣
不無勞費至厄魯特等新經安插復令從軍未
免驚擾且伊等性多貪狡軍前有違紀律於事
無益應停其調遣請將所奏兵丁四百名減為

二百名派索倫兵一百五十名喀爾喀兵五十名再於達什達瓦屬人等熟悉路徑者酌帶數人作為嚮導至所奏派出喀爾喀公台吉等應請准其帶往所有派調官兵俱照例賞給整裝銀兩奏入

上從之

辛卯

諭大學士管理陝甘總督黃廷桂解送巴雅爾等來

京

上諭軍機大臣曰據豆斌奏稱端濟布將嚮導巴雅爾等送至巴里坤并聲明伊等俱奮勉効力請遵旨照情有可原之例分賞官兵并行文黃廷桂等語所辦甚屬拘泥巴雅爾等身在軍營較不從逃叛前來送信之人尤為出力非但情有可原而已可傳諭黃廷桂即曉示巴雅爾等辦事大臣請將爾等分賞官兵大皇帝念爾等俱係効力之人恩

旨送入內地即將伊等派員解送來京

命加吐魯番貝子額敏和卓貝勒品級

上諭軍機大臣曰吐魯番貝子額敏和卓遣人前往
哈喇沙爾採取沙喇斯瑪呼斯信息即領兵前往
托克三守候後因賊人未至哈喇沙爾又遣往和
爾米斯和喇探聽相機進勦似此感激朕恩誠心
効力甚屬可嘉著加恩給與貝勒品級明歲辦理
葉爾羌喀什噶爾等處令為叅贊昨已降旨其益

加奮勉以膺恩賞

署章京噶布舒護軍校桑烏善押送厄魯特伊
宛等來京得

旨伊宛授為藍翎侍衛賞銀五十兩達瓦在司轡上
行走賞銀二十兩噶布舒授三等待衛賞銀五
十兩桑烏善授藍翎侍衛賞銀三十兩

軍機大臣疏奏傳

諭安插伯格里妻室

軍機大臣奏言伯格里之妻到京臣等遵

旨傳諭云從前

皇上加恩准爾率屬移於察哈爾續經將軍大臣叅
奏爾以台吉之妻不修婦道難於管領屬人請
將爾治罪

皇上格外施恩

命爾與噶爾藏多爾濟之妹同居傳示畢隨將伯格
里妻女及婢女二人送往安插其隨僕八人暫

交理藩院看守候賞駐防官兵奏入報

聞

壬辰

申諭定邊將軍成袞扎布等酌定軍營馬匹數目

上諭軍機大臣曰據黃廷桂奏稱應送巴里坤馬匹
業經分起節次起程俟成袞扎布咨到照數送往
等語昨曾傳諭成袞扎布兆惠等令於軍營現存
馬內選出二千五百匹加意牧放以備征進則黃

廷桂辦送之馬祇需五千五百匹伊等定議後即行文知會今黃廷桂既經奏報起程著成衮扎布兆惠等速行定議知會不可再遲此際伊等現在何處即速奏聞亦傳諭黃廷桂知之

諭定邊將軍成衮扎布等確查叛賊琿齊蹤跡

上諭軍機大臣曰昨諭將達瓦之弟鄂爾奇達遜送京今據供稱琿齊踪跡似向空格斯逃去等語著便中傳諭成衮扎布兆惠等確查具奏

癸巳

定議哈薩克交易事宜

軍機大臣奏言黃廷桂奏籌辦哈薩克交易事宜一摺奉

旨軍機大臣議奏查臣等前因兆惠等奏阿布賚請將馬匹赴烏魯木齊交易臣等議以程途頗遠商販難於聚集請官為經理選派熟諳交易之人照商人一例不必顯露官辦形迹今據該督

奏稱烏魯木齊交易運費浩繁似在吐魯番為
便其明歲交易止換馬匹若哈薩克帶有駝隻
牛羊亦係軍營需用請一體收買其應需緞疋
若由內府辦解綠色精良而官辦後仍必招商
將來恐成色略減致煩言論現在陝省採辦各
色緞疋及巴里坤現存雜色梭布京庄布均可
敷用哈密現存茶封為數頗多一切馱運即用
軍營餘駝酌量雇覓商駝添備車輛遴委道員

同知副將酌派備弁兵丁押送等語查臣等原議哈薩克交易在烏魯木齊因前與阿布賚定約奉

旨允准似不便更易致失信遠人雖運費浩繁原可增加價值至吐魯番近接邊陲建有城堡較烏魯木齊地方空濶可以隨處開市者不同恐哈薩克人等與回民熟習轉致滋擾應仍照臣等原議至收換馬匹騾馬之外有隨帶騾馬亦可

量收庶於孳生有益其他牲畜亦應一體收買至疲瘦牲畜一切雜貨雖不應交易但念其攜帶遠來或減價收留以示節制其緞疋一項陝省既可採買應如所奏辦理至布疋茶封尤哈薩克所必需今哈密既有茶封巴里坤亦有購備布疋應令雇覓商駝或添備車輛運送不必挑用軍營餘駝其遴委道員同知副將等員并酌帶將弁挑派兵丁應需鹽菜口糧及商民

人等願隨前往購買零星物件各聽其便俱應
如所奏再該督奏派兵一百名係因吐魯番現
有屯兵足資彈壓今既仍在烏魯木齊交易應
否添派兵丁亦聽該督酌量辦理明歲係初次
貿易自當立定章程不可遷就而交易之際又
必示以公平俾遐荒感知

天朝柔遠之經方為妥協應交該督轉飭道協各員
善為經理可也奏入

上諭曰黃廷桂所奏籌辦來年哈薩克貿易事宜一摺已據軍機大臣議奏但貿易之事不過因其輸誠內嚮俾得懋遷有無稍資生計而彼處為產馬之區亦可以補內地調撥缺額並非藉此以示羈縻亦非利其所有而欲賤值以取之也將來交易之際不可過於繁苛更不必過於遷就但以兩得其平為是可傳諭黃廷桂令其善為經理至奏內所稱委派道廳等員看來貿易之事終不可全以

官法行之能辦政務者未必熟諳商賈朕思道員
中如范清供同知中如范清曠等伊家原曾承辦
軍營及一切貿易應尚有舊時商夥習練其事或
可於此二人中酌調一人赴甘承辦是否有益并
著妥議奏聞

叅贊大臣副都統哈寧阿疏奏協助端濟布勦
賊情形

哈寧阿奏言臣於九月二十九日至濟爾哈朗

軍營聞知將軍成衮扎布等由閭勒奇回兵副
將軍兆惠亦合兵一處其濟爾哈朗至博羅塔
拉無庸設立臺站惟叅贊大臣富德尚在博和
什騰等處是以庫爾河等臺站未曾全撤臣因
山中降雪恐嗎哈沁等侵擾臺站將所領兵三
百名內挑選一半巡查十月十三日接雅爾哈
善行文扎哈沁之得木齊哈勒拜等現在烏勒
郭蘇山內之沙扎海地方藏匿已飭總管端濟

布達勒速派官兵協助臣即於所帶兵丁內挑
選五十名派虛銜藍翎綏神保等迅往協助端
濟布奏入報

聞

平定準噶爾方略正編卷四十五

欽定四庫全書

平定準噶爾方略正編卷四十六

乾隆二十二年冬十一月乙未

諭定邊將軍成衮扎布等來京請訓

上諭軍機大臣曰現在逆賊阿睦爾撒納已逃入俄羅斯俄羅斯與喀爾喀毗連一應偵探防範事宜甚關緊要成衮扎布素得喀爾喀之心為衆所推服且伊久在行間亦宜稍為休息著仍為北路將

軍辦理喀爾喀事務策布登扎布年富力強辦事雖不及伊兄而攻戰較為差勝又經休息年餘明歲辦理回部以兆惠為將軍策布登扎布副之已傳諭策布登扎布來京請訓再赴軍營雅爾哈善候伊到日即將副將軍印務交代一同領兵前赴沙喇摩勒勒滅巴圖爾烏巴什等賊衆成衮扎布兆惠等亦即來京商辦一切事務其沙喇斯瑪呼斯等賊已專交阿里衮滿福辦理成衮扎布等至

巴里坤須作速趲行方不誤兆惠回抵軍營之期也

丙申

諭戶部侍郎阿里衮等追勦沙喇斯瑪呼斯賊衆事宜

上諭軍機大臣曰據阿里衮等奏稱領兵至托克三擒獲嗎哈沁等訊知沙喇斯瑪呼斯等賊衆越達朗嶺往投昂吉岱等語前據成衮扎布奏稱昂吉

岱等賊衆渡伊犁河往沙喇孛勒會合巴圖爾烏
巴什今沙喇斯等亦投昂吉岱自係尋踪前往即
使時屆冬寒不得到沙喇孛勒而巴圖爾烏巴什
或料我撤兵復回伊犁會合賊黨過冬亦未可定
阿里衮額敏和卓等應即趨行政其不備此時滿
福追勦賊衆倘因其遠遁竟行退回阿里衮等更
宜前往或知會濟爾哈朗軍營派兵策應若果追
至伊犁賊衆仍復前去我兵馬力疲乏即撤回亦

可至額敏和卓懇請隨同進勦甚屬可嘉著照叅贊分例支取廩給所帶回兵著查明曾否賞給銀兩及關支口糧照進勦官兵例一體辦理

命議處副都統三格等

上諭軍機大臣曰據雅爾哈善等覆奏端濟布三格額爾登額辦理琿齊額林沁達瓦等脫逃情形端濟布招降琿齊時因伊等稱其投誠隨帶兵前往扎哈沁其琿齊之脫逃與端濟布無涉至三格額

爾登額既將琿齊額林沁達瓦喚至軍營即應看
守解送乃為賊所欺令其復回因而叛逃猖獗致
總管巴寧阿等遇伏陣亡仍未能奮勉進勦三格
額爾登額俱著交部嚴察議奏

命喀爾喀親王得親扎卜為叅贊大臣協辦軍務
上諭軍機大臣曰昨命策布登扎布來京納穆扎爾
署理定邊左副將軍印務親王得親扎卜係喀爾
喀舊人諳悉事體著授為叅贊大臣協同納穆扎

爾辦事

命優卹喀爾喀郡王品級旺布多爾濟等

上諭軍機大臣曰成衮扎布等奏稱喀爾喀郡王品級旺布多爾濟公品級頭等台吉三濟扎卜俱出痘身故等語昨因伊等久在軍營令回游牧休息今聞身故深可憫惻著加恩將旺布多爾濟之子承襲貝勒仍賞給郡王品級三濟扎卜之子承襲頭等台吉仍賞給公品級再賞給旺布多爾濟銀

五百兩三濟扎卜銀三百兩

命陞補軍營効力之主事常鈞及議叙副都統圖倫楚所領官兵

上諭軍機大臣曰據兆惠奏稱主事常鈞額外主事法哈委署主事和倫等三人在軍營數年承辦事件既無貽誤且効力行間頗知奮勉等語著照所請將主事常鈞授為額外員外遇缺即補所遺主事員缺著法哈補授委署主事和倫授為額外主

事遇缺即補又

諭曰兆惠奏稱圖倫楚帶兵一百名擊敗哈薩克錫喇勒殺嗎哈沁等以寡敵衆追蹤跟擊頗屬奮勉等語圖倫楚已加恩補授副都統所領官兵著分別功次造冊送部議叙

命革副都統三格職降副都統額爾登額為三等侍衛効力贖罪

上諭軍機大臣曰昨命兆惠查勘三格額爾登額端

濟布等辦理琿齊額林沁達瓦情形據奏厄魯特
朝降夕叛衆所深悉而三格額爾登額受其欺詐
倉猝回兵以致琿齊等脫逃但額爾登額追勦扎
哈沁賊衆頗知奮勉端濟布如何招服琿齊并通
來有無勞績俟至濟爾哈朗會同將軍等查奏等
語端濟布甫經招降即帶兵勦撫扎哈沁功罪自
可相抵三格從前既疎脫尼瑪及琿齊等已至軍
營又復縱回游牧其罪較額爾登額更甚三格著

革去副都統以兵丁効力贖罪額爾登額革去副都統降為三等侍衛効力贖罪

定邊右副將軍兆惠疏請以雙全補授護軍留軍營効力

兆惠奏言現在軍營行走之雙全係正紅旗蒙古烏鎗護軍雍正九年在和通呼爾哈為厄魯特所掠二十餘年去年隨營効力經臣等

奏請如果奮勉即撥回本旗當差查雙全識托忒

字習尼魯特言語於哈薩克回部等情形亦頗
熟悉本年哈薩克遣使到營令伊通事傳語俱
能達意請將雙全咨行該旗坐補護軍留於軍
營効力行走奏報

聞

庚子

察哈爾總管端濟布疏奏追勦扎哈沁情形

端濟布奏言臣帶兵搜勦烏魯木齊昌吉羅克

倫等處嗎哈沁捉生詢問知扎哈沁得木齊哈勒拜殺巴哈曼集同得木齊達爾扎巴朗藏匿烏蘭烏蘇山內沙扎海地方欲圖搶掠臺站准濟爾哈朗軍營叅贊大臣調令勦捕臣於十月十三日至瑪納斯臺站叅贊大臣哈寧阿派兵協助十五日擒獲嗎哈沁十餘名訊係扎哈沁屬人因哈勒拜肆行搶奪逃向達爾扎游牧達爾扎等欲搶額倫哈達臺站恐有官兵今自沙

扎海移來三日等語十六日晚帶兵渡瑪納斯河至美羅托山掩襲達爾扎游牧為賊衆所覺即放鎗逃走官兵奮勇攻擊十七日殺賊百餘人收取馬駝牲畜其臨陣被傷兵丁查明咨報奏入

上諭軍機大臣曰據端濟布奏稱追勦扎哈沁賊衆至美羅托山勦殺百餘人等語所有陣亡帶傷兵丁著查明報部優卹但端濟布奏摺甚屬含混如

所云晝夜掩襲為賊衆所覺放鎗逃走則伊等不
過追及後隊而逃去者必多端濟布即應就所得
馬駝牲隻窮追務獲何以未經奏及著雅爾哈善
查明速催端濟布同哈寧阿相機追剿又

諭曰昨據哈寧阿奏稱帶兵前往瑪納斯呼圖畢羅
克倫昌吉等處照看解送口糧搜剿嗎哈沁有應
行協助端濟布之處即相機接應等語所奏甚是
與朕前降諭旨相符今據端濟布奏稱剿賊百餘

卷四十六
仍有逃去者哈寧阿正宜留心偵探相機策應務期盡勦賊衆以清臺站

辛丑

諭定邊將軍成袞扎布等查滿福勦賊情形

上諭軍機大臣曰成袞扎布等奏據遣往堵截巴哈曼集之侍衛海林泰報稱在博羅托羅海地方捉生詢問知巴哈曼集為得木齊哈勒拜所殺賊衆欲至空格斯恐有兵堵截即由克勒特前去已過

八站適與滿福相遇將情節告知而滿福以現在
追勦沙喇斯等叛賊自己顏阿滿一路安設臺站
不可擅動兵丁因無兵追賊遂同滿福前進等語
滿福帶兵追賊自當隨遇隨勦乃舍現在相近之
扎哈沁而追遠竄之沙喇斯等殊屬懦弱滿福果
能追勦沙喇斯等尚可功罪相抵若藉口窮追不
及馬力疲乏竟行撤回則罪不可逭著傳諭成衮
扎布等看滿福呈報若何據實速奏若已起程前

來即交雅爾哈善查奏

命賜二等侍衛寧古禮號克丑巴圖魯總管圖布巴
圖魯溫布給與副都統銜俱賞銀一百兩

乙巳

諭喀爾喀郡王品級車木楚克扎布查拏逆賊阿睦
爾撒納

上諭軍機大臣曰昨據策布登扎布奏稱令車木楚
克扎布會同察達克辦理烏梁海博和勒那木查

爾等語此際應已前往現在逆賊阿睦爾撒納逃
入俄羅斯或俄羅斯令伊帶領烏梁海逃人復出
滋事亦未可定可傳諭車木楚克扎布於途次留
心察訪一聞阿逆之信即帶兵前往擒拏併諭知
察達克奮勉協助仍將現辦烏梁海情形及有無
他處賊人蹤跡作速奏聞

諭厄魯特散秩大臣和碩齊等查拏逆賊阿睦爾撒
納

上諭軍機大臣曰昨諭和碩齊等於護送哈薩克使臣之便沿途或遇逆賊阿睦爾撒納及大隊賊衆伊等兵力無多令唐喀祿帶兵二百名於中途等候一得信息即前往接應今阿逆逃入俄羅斯或俄羅斯令其帶領烏梁海逃人復出滋事亦未可定和碩齊於沿途察訪一有阿逆信息即帶兵往擒仍速飭唐喀祿接應若阿逆果如所料正和碩齊立功之時哈薩克使臣原可自回游牧若願協

擒逆賊即與同行至唐喀祿係獲罪之人亦可藉以自贖其務悉心訪查奮勉効力

大學士管陝甘總督黃廷桂等疏奏滿漢標營坐扣銀兩分年展扣事宜

黃廷桂奏言臣等欽奉

恩旨將陝甘二省滿漢各營採買補缺馬匹借墊銀三十五萬九千三百兩零免其扣還其解送馬駝添補口食盤費坐扣未完銀六十萬八千三

百兩零酌量分年展扣以紓兵力仰見

皇上俯恤邊兵至意臣等酌議各營應支馬乾俱已
留為餵馬之用每歲漆製軍裝及差使盤費俱
係該營自行措辦於季餉內扣還又有朋扣銀
兩并年底在司庫接濟以及糧貴時豫借銀米
均應於季餉內扣繳現在朋餵解送正餘馬一
萬三千餘匹加漆料豆製備衣裝統需陸續扣
還再加此項坐扣銀六十萬八千餘兩誠如

恩諭自應寬以期限俾季餉扣還之外各有餘剩應
請自乾隆二十三年春季為始各於本營季餉
內分作六年扣還庶期限既紓兵力以裕矣奏
入得

旨六年尚覺限迫著寬至十年

丙午

大學士管陝甘總督黃廷桂疏奏查辦克勒特
人衆

黃廷桂奏言克勒特人衆於十一月初二三等
日解送到肅臣隨傳伊總管根達什副總管莽
蘇爾等宣示

恩旨移送內地養贍照查送得木齊多爾濟家屬之
例并伊等親屬派員送交理藩院查辦所帶馬
駝牲隻變價給領其餘男婦二千三百餘口陸
續撥送陝甘兩省各標營分賞官兵其馬駝牲
隻變價抵補解送口糧之用又奉

旨將端濟布所奏作為嚮導之巴雅爾等移送內地
現准軍營大臣等移咨於十月二十一日押解
起程俟到日宣示

恩旨照例送京奏入

上諭軍機大臣曰現在由巴里坤送至肅州賞給官
兵之厄魯特等特因其情有可原始如此辦理但
伊等心懷叵測而肅州等處距口甚近或有約會
逃走妄行生事之處即當正法示衆著曉諭得賞

官兵留心驅策如不遵約束雖至死亦不加罪若
生事逃竄則罪有所歸黃廷桂等亦當時為稽察
大學士管陝甘總督黃廷桂疏奏解送軍營馬
匹

黃廷桂奏言臣於十月二十八日起解馬匹出
關嗣於二十九至十一月初九等日將先到馬
內挑選八九分臚壯者按日分起管解出口已
有六千匹計月底可至巴里坤其餘西安標營

之馬各令速解抵肅亦一律挑選解送以足八千匹之數如止需馬五千五百匹則先解之馬已經足用其餘即行截回又奉

旨派解馬匹之副都統巴圖濟爾噶爾等於初九日抵肅據稱自巴里坤至濟爾哈朗道遠天寒恐馬匹不無倒斃之弱須於正解外得帶餘馬以備補缺臣查此次解送馬匹係按照官兵數目缺一不可因酌於正馬外又給餘馬五百匹俱

挑選臆壯以備軍營撥補之用奏入報

聞

己酉

命獎賞內大臣察達克等

上諭軍機大臣曰昨因察達克等所屬之烏梁海歸

順已經數載應與新降人等一體納貢曾經降旨

查辦今據策布登扎布奏報察達克此次招服烏

梁海博和勒等甚屬奮勉可嘉著傳諭策布登扎

布將烏里雅蘇台所貯緞疋酌量獎賞其所屬烏
梁海等今年應納之貢俱行寬免以明歲為始即
行知車木楚克扎布等遵照辦理

庚戌

命傳諭招服之烏梁海博和勒等

上諭軍機大臣曰察達克招服烏梁海甚屬奮勉著
賞緞四端其次奮勉人等各賞緞二端策布登扎
布仍傳諭博和勒伊等去年雖附和妄動今察達

克一經招撫即時歸服是以寬宥前罪博和勒著
還原職仍授為三品總管賞緞二端其那木查爾
庫克新等投順之日亦照此傳諭復職受賞博和
勒等游牧與俄羅斯相近逆賊阿睦爾撒納逃入
俄羅斯伊等一有所聞即當報明陳奏策布登扎
布等如得阿逆信息一面知會和碩齊唐喀祿帶
兵協助車木楚克扎布等一面帶兵勦捕總以擒
獲阿逆始可竣事伊等務益加奮勉以奏膚功再

俄羅斯等寄博和勒之托忒字書內有柰曼噶擦克之人逃入內地等語此項人等如果來投即應受降亦當留心辦理

議喀爾喀應交馬駝牲隻事宜

署定邊左副將軍策布登扎布奏言欽奉

恩旨喀爾喀應賠馬駝牲隻酌量於伊等生計有益寬限辦理臣謹委管理收牧之扎薩克等自乾隆十八年至二十二年收牧動用銷算倒斃數

目擬定應免應賠及交還限期具

奏得

旨軍機大臣議奏尋議喀爾喀收牧馬匹牲畜由四
部落採買各處進獻及厄魯特游牧收取西北
兩路官兵交收等項共馬十五萬匹有奇駝二
萬一千二百隻有奇牛二萬二千三百頭有奇
羊四十六萬九千隻有奇計自乾隆十九年以
來追擒巴朗收服扎哈沁色沁烏梁海等平定

伊犁追擒阿睦爾撒納進勦和托輝特哈薩克
等處支用及患病倒斃并車臣汗等部落趕往
各數外現在牧放馬三千三百匹有奇駝一千
有奇牛四百有奇羊二萬四千四百有奇查軍
營收牧定例按年銷算若未經動用者每年每
百匹准銷倒斃四匹已經動用者准銷八匹今
策布登扎布未將倒斃數目按年銷算與例不
符但蒙我

皇上愛養喀爾喀降有

恩旨臣等仰體

皇上仁慈俾喀爾喀生計饒裕酌議應如策布登扎
布所奏將乾隆十八年收牧馬六千匹駝三千
隻照未經動用例每百准銷四匹十九年以來
收牧馬駝照已經動用例每百准銷八匹不計
所牧年歲作為一年應免之數銷算其牛羊係
屬口糧自難照動用馬駝之例應准其每百內

倒斃四隻外仍有額外倒斃亦應如所奏先將
車臣汗部落收回各數於一年內追交完項再
自己卯年起展限五年交納仍將現在牧放馬
駝牲隻飭交扎薩克等加意牧放其應追各項
數目令該副將軍分晰造冊報部按限催交奏
入

上從之

議軍營應交馬駝事宜

署定邊左副將軍策布登扎布奏言欽奉

諭旨將軍營原有馬駝辦給交回及例准倒斃各數
查奏臣謹委管理馬駝之扎薩克等查得大兵
平定伊犁各隊官兵共給馬六萬九千匹有奇
駝七千七百隻有奇追勦阿睦爾撒納包沁及
辦理訥默庫等給馬六千二百匹有奇駝一千
九百有奇進勦烏梁海哈薩克給馬一萬四千
二百有奇駝一千六百有奇擒拏青滾雜卜給

馬四千六百有奇駝四百有奇計各隊撤回馬
一萬二千九百匹有奇駝一千九百隻有奇騎
回游牧馬四萬五千七百匹有奇駝五千六百
隻有奇存留烏里雅蘇台及調往巴里坤官兵
馬三萬五千三百匹有奇駝四千一百隻有奇
謹將辦給各隊官兵及交還騎回馬駝數目酌
量准銷倒斃分數列單恭呈

御覽得

旨軍機大臣議奏尋議查該副將軍所奏乾隆二十
年撤回京營黑龍江等兵丁行至額爾齊斯等
處者已蒙

恩旨照金川軍需例准其豁免十分之三又另摺所
奏都爾伯特汗策凌等應追馬駝業經展限現
奉

恩旨豁免均毋庸另議外二十年大兵平定伊犁直
抵布魯特邊界較額爾齊斯更遠應將所領馬

駝豁免十分之五二十一年進勦烏梁海哈薩
克官兵俱至伊什勒河歸途又趨拏青滾雜卜
該將軍奏請全行豁免但恐官兵恃有此例將
遠行馬駝不復愛惜應較前往伊犁酌量加倍
豁免十分之八其和托輝特官兵隨青滾雜卜
私回游牧所領馬駝不准豁免俱令照數賠補
又擒拏青滾雜卜官兵並未遠行但時值冬寒
應將所領馬駝豁免十分之三又收取阿睦爾

撤納游牧追勦色沁等官兵亦未遠行應將所
領馬駝豁免十分之二再本年撤回之京營綠
遠城等官兵交兵部行查現在兩路官兵俟撤
回時行查辦理其喀爾喀等所領馬駝內除應
豁免數目外其餘理應追繳但伊等賠補牧放
牲隻已議展限五年俟交完後再限三年令其
補交至厄魯特班珠爾等馬駝業經籍沒應毋
庸議其扎哈沁烏梁海等原領馬一千七百匹

有奇駝二百隻有奇除豁免外仍應追繳馬九
百匹有奇駝九十隻有奇照例令其交出其官
兵應交馬駝造冊咨送戶部喀爾喀等應交馬
駝造冊咨送理藩院按限追繳奏入得

旨依議扎哈沁烏梁海人等甚屬安靜亦俱奮勉効
力應交馬駝著加恩寬免

辛亥

軍機大臣疏奏詢問伊什克來投情形

軍機大臣奏言臣等遵

旨詢問伊什克據供我父原係拉藏汗屬人於康熙
年間為準噶爾所掠遂屬綽和爾鄂拓克今因
游牧擾亂是以來投等語臣等看伊什克人尚
明白年力亦壯應如何安插之處候

旨遵行得

旨伊什克著在上駟院司轡上行走仍編入蒙古旗
分

壬子

密諭內大臣察達克誘擒阿逆之策

上諭軍機大臣曰昨命車木楚克扎布等因辦理烏
梁海之便察訪逆賊阿睦爾撒納信息今思阿逆
奸詭異常或差遣數人到烏梁海探聽情形亦未
可定然即擒此數人亦於事無益若果有此舉則
察達克不妨陽為約結告伊來人以現在大兵盡
撤烏里雅蘇台亦駐兵不多我等乘此會合擾亂

喀爾喀搶掠烏里雅蘇台之語若阿逆肯來便可
擒獲或察達克相機前往虛作投順之狀誘出逆
賊相機辦理亦可著傳諭察達克悉心籌酌不拘
何時皆可用此策但宜密而又密不可漏洩致無
知妄傳轉足債事察達克自必有親信數人相與
計議若能擒獲逆賊朕於察達克及烏梁海人等
必沛殊恩務宜奮勉車木楚克扎布等如何密行
傳諭察達克所見如何及現在阿逆信息俱作速

奏聞併傳諭納穆扎爾知之

申諭將軍大臣等奏報軍營情形

上諭軍機大臣曰成衮扎布兆惠等自本月初十
三等日奏事後距今十餘日未見摺奏前經屢諭
伊等回至濟爾哈朗同雅爾哈善等酌議駐兵之
地及明歲進兵之期并來京請訓等事伊等此時
已至何處未見奏到豈臺站尚有遲誤耶至阿里
衮雖據奏稱沙喇斯瑪呼斯等賊已過達朗嶺伊

與額敏和卓帶兵追往但曾否與滿福相會又端
濟布前追巴哈曼集賊衆朕慮伊兵力單弱命哈
寧阿帶兵協助若已會滿福距端濟布甚遠即不
必再往此際哈寧阿究與何人會兵均未奏到並
著傳諭詢問

癸丑

諭副都統巴圖濟爾噶爾等沿途勦賊事宜

上諭軍機大臣曰此數日軍營並未奏到事件恐臺

站或有疎虞今巴圖濟爾噶爾等由巴里坤護送
馬匹帶有兵丁著傳諭伊等如遇嗎哈沁賊人即
行勦殺其兵丁自有乘騎足以擊賊不可動用軍
營馬匹以致疲乏如無此事惟以謹護馬匹為要
計此旨到日伊等已過巴里坤著交與巴里坤辦
事大臣等速為追送

乙卯

定邊將軍成衮扎布等疏奏駐兵勦賊等事宜

成衮扎布等奏言臣等於十月二十八日十一月初一日節次奉到

諭旨令將撤兵過冬處所明春進兵程期及兵丁馬匹數目公同酌議具奏查巴圖爾烏巴什等賊會合一處向沙喇孛勒逃去自應速行追勦至回人既敢戕害阿敏道又聞波羅泥都霍集占等聚衆拒守其阿克蘇庫車等處係進兵道路葉爾羌喀什噶爾等處乃其巢穴俱宜陸續辦

理計兀魯特賊衆約有數千戶可得戰兵五六千伊等皆自知必死如我兵力弱恐致逃竄至勦滅賊衆後即應於特穆爾圖淖爾納林等處休息馬力進取回城臣等公同詳議明春遣發大兵勦滅賊衆收其牲畜直擄回酋巢穴現奉聖謨指示實已洞鑒事機臣成衮扎布等及滿福所領兵共二千七百餘名臣兆惠及富德瑚爾起順德訥端濟布所領兵共三千四百餘名合計

現兵六千餘名計可挑選四千名軍營馬匹既多倒斃疲乏濟爾哈朗一帶久住草枯惟烏魯木齊至瑪納斯一帶水草俱佳可以游牧過冬仍派兵五百名安設臺站查駐兵之地至沙喇摩勒程期約四五十日若於來年正月下旬進兵計三月十五日前後可到餘兵千餘名令愛隆阿帶領至魯克察克整理豫備再派巴里坤綠旗兵一千合為二千餘名在魯克察克豫備

又現在吐魯番屯田綠旗兵八百名亦令攜帶
籽種於來春在哈喇沙爾或伊拉里克等處種
地令魯克察克豫備兵二千餘名同往以壯聲
援又豫備哈薩克貿易派綠旗兵五百名并令
額敏和卓酌派回兵遣往烏魯木齊種地俱先
至魯克察克自己里坤辦給口糧籽種至進勦
官兵口糧及籽種器具均須大員經理臣等公
議派臣永貴前往再臣等現議來年正月進兵

若趨赴京師復回軍營恐踰期限謹酌擬領隊
大臣侍衛等開列名單恭候

欽定奏入

上諭軍機大臣曰成衮扎布等奏稱來年正月進兵
若趨赴京師往還恐逾期限等語著照所請不必
來京但朕昨命策布登扎布同兆惠明歲進兵今
阿逆已逃入俄羅斯喀爾喀處索取阿逆及辦理
地方事務伊兄弟二人不可不駐劄一人成衮扎

布年長喀爾喀素所心服策布登扎布年富力強
著伊同兆惠進勦成衮扎布仍著來京請訓再赴
喀爾喀辦理事務成衮扎布奉到此旨其將軍印
務交與兆惠兆惠俟策布登扎布到日以副將軍
印務交代時值冬寒成衮扎布不必速行惟量力
前進明歲進兵策布登扎布富德哈寧阿羅卜藏
多爾濟明瑞鄂博什溫布俱著在哨探隊內行走
其巴圖魯侍衛酌量派出巴圖濟爾噶爾送馬到

日亦在哨探隊內行走郭木尼勒圖富紹酌派領
隊其駐兵魯克察克豫備回部永貴一人不足著
雅爾哈善同順德訥愛隆阿酌派巴圖魯侍衛二
員前往永貴既在魯克察克辦事候事竣再赴西
安巡撫之任其餘大臣侍衛官員分隊安臺屯田
牧馬等事俱照所奏行前曾諭策布登扎布雅爾
哈善帶兵先行兆惠富德來京馳驛回營尚可追
及伊等奉到此旨如已起程亦不必中途復回再

額敏和卓現同阿里袞追勦沙喇斯等賊衆如已竣事即回游牧休息來年辦理回部著同富德在哨探隊內行走又

諭曰成袞扎布兆惠等奏來京恐誤進兵之期朕已允所請富德奉到此旨如尚未起程即不必來京至伊所奏遣使赴哈薩克時令其供備口糧駝馬一事哈薩克甫經歸附且素習貪吝不可稍有派累即遣使前往攜帶物件亦可換易口糧今阿睦

爾撒納逃入俄羅斯努三不必在哈薩克久住著
行文撤回

命留乾清門侍衛富紹侯送添撥軍營馬匹

上諭軍機大臣曰成衮扎布等奏稱明歲進兵計馬
八千匹不敷派撥請添送二千匹等語已諭黃廷
桂趲辦矣著於巴圖濟爾噶爾三人內留富紹守
候巴圖濟爾噶爾等大隊前行已經搜勦嗎哈沁
富紹護送此項馬匹不必多留兵丁惟酌量足數

照管馬羣可也

丙辰

獎諭戶部侍郎阿里衮等

上諭軍機大臣曰阿里衮額敏和卓奏稱伊等由阿
斯罕布拉克和什特勒克一路取道速行於十月
二十八日抵沙喇斯瑪呼斯游牧之哈喇沙爾等
處搜查山僻賊衆至塔本順和爾納木噶擒獲嗎
哈沁奇齊克等男婦二百餘口今往呼魯木什和

羅侯勦滅瑪呼斯賊衆再越達朗嶺進勦沙喇斯
昂吉岱賊衆等語阿里衮額敏和卓此次辦理頗
屬奮勉從前因阿里衮帶兵遲延交部議處經部
議革職朕諭以且觀後效今既自知罪愆奮勉行
走著加恩免其革職額敏和卓著賞緞四端遣往
偵探之佐領愛斯瑪特及奮勉之官兵回人等俱
著查明獎賞再據嗎哈沁供稱瑪呼斯得木齊和
通告稱滿都統遣伊前來現在兩三路進兵等語

則似滿福已招服瑪呼斯人等矣滿福現在何處
究未奏及著阿里衮等帶兵速進即使滿福業已
招降亦不可憑信仍行勦殺滿福甚屬無用一切
事務阿里衮惟與額敏和卓悉心商酌併將滿福
信息作速奏聞

丁巳

命原任巡撫定長以副都統銜馳驛前赴西路軍營
辦理糧餉事務在領隊大臣上行走

議增派吐魯番屯田兵丁

軍機大臣奏言臣等查將軍成衮扎布等奏稱
來年派兵二千自魯克察克起程前往哈喇沙
爾伊拉里克等處請將吐魯番屯田綠旗兵八
百名攜帶籽種同往即在哈喇沙爾等處耕種
等語但吐魯番今歲耕種已有成效非特不可
空閑更當增加開墾臣等酌議吐魯番現在耕
種之綠旗兵准其移往哈喇沙爾等處應請

旨交雅爾哈善查明吐魯番現種熟地若干頃此外
有無可墾之土共需兵若干酌定數目移咨黃
廷桂派出兵丁辦給籽種器具遣往吐魯番接
種庶地無遺利而軍食益饒矣奏入報

聞

大學士管陝甘總督黃廷桂疏奏辦解軍營馬
駝

黃廷桂奏言臣於十月二十八日至十一月二

十一日共解送軍營馬八千餘匹茲准巴里坤辦事大臣移送將軍成衮扎布疏稿內稱臺站兵需馬一千又添給官兵馬一千共需解馬一萬匹等語臣即將發回各營餘馬委員沿途挑選解肅趕送出關又查晉省辦駝三千餘隻於九月陸續抵肅今准提臣豆斌咨取撥用臣因此項駝隻往來解送不無疲乏隨挑選堪用駝二千隻於十一月十二三等日解送餘駝仍令

牧養查甘省近邊多有商駝行走即密行涼州
平涼寧夏西寧各府速為購買轉解雖略需時
日但巴里坤現辦官兵口糧已有羊二萬餘隻
其餘米麵等項分次起運自可無悞奏入報

聞

戊午

命以軍營奮勉兵丁行文本旗陞補

上諭軍機大臣曰據成衮扎布等奏稱軍營索倫兵

丁行走已及四年伊等本旗缺出俱坐補在家之人以致陞轉遲滯請將軍營奮勉兵丁列為一等者咨行該旗遇應陞之缺即行陞補其吉林察哈爾綠旗兵丁亦請照此辦理等語所奏甚是但現在索倫等本地出缺及遇有他處缺出軍營行走之人原有補缺之例因該處未曾行文軍營伊等無從得知著軍機大臣交部將此等補放之人查明知會軍營其軍營造冊保送之索倫吉林察哈

爾綠旗兵丁亦即行文各該處於行文到日遇有
應行陞補之缺俱以軍營之人擬正奏請補授即
使伊等年資稍淺而効力疆場與居家者迥異必
如此拔擢方足以示鼓舞併傳諭各該將軍總督
總管等知之

平定準噶爾方略正編卷四十六